

President e vice vegnan dal medem chantun

■ (anr) Per l'emprima giada ha l'assemblea federala elegì cun cuss. fed. *Simonetta Sommaruga* (socialdemocrata) sco presidenta da la confederaziun per 2015 e cuss. fed. *Johann Schneider-Ammann* (liberaldemocrat) sco viceparsura dus magistrats bernais a la testa dal cussegl federal ed uschia era da la confederaziun. Quai n'ha igl anc maina dà. L'onn 1999, cun la costituziun federala revidida, è numnadamain l'artitgel costituziunal 96 da la costituziun federala da 1874, che lubeva d'eleger be in sulet cusseglier federal per chantun (clausula chantunala) vegni stritgà. Uschia na pudevan er il parsura ed il viceparsura da la confederaziun betg derivar fin alur dal medem chantun.

Da 1848–1895 – pia durant 47 onns – èn be liberals stads presidents da la confederaziun. En tut ha quella partida gi fin ussa na main che 104 onns (da total 167) il presidi. La pcd ha survegnì 1895 per l'emprima giada il president dal cussegl federal. Fin ussa ha ella mess quel durant 31 onns. I suonda la Partida socialdemo-

cratica cun 17 presidents da la confederaziun. La pps (l'antieriura BGB) ha gi 12 giadas il parsura da la confederaziun e la pbd in onn.

L'emprim president da la confederaziun è stà il liberal turitgais Jonas Furrer 1848 e l'emprim catolic-conservativ Josef Zemp 1895 dal chantun Lucerna. L'emprima presidenta da la confederaziun è stada *Ruth Dreifuss* (socialdemocrata) 1999. Simonetta Sommaruga è la tschintgavla dunna a la testa dal cussegl federal.

I dat dentant en tut 18 cussegliers federali (da total fin ussa 115) che n'èn mai stads presidents da l'executiva federala. I saja numnà be ils trais davos: cuss. fed. *Elisabeth Kopp*, cuss. fed. *Ruth Metzler* sco era cuss. fed. *Christoph Blocher*.

E lura datti anc adina – 166 onns suenter la fundaziun da la nova confederaziun 1848 – tschintg chantuns che n'han anc mai gi in cusseglier federal – e consequentamain era nagin president da la confederaziun. Igl èn quai Uri, Sviz, Sutsilvania, Schaffusa e Giura.